

四庫全書

史部

欽定四庫全書

欽定續通志卷四百十六

列傳

宋

一百二十

劉應龍

潘枋

洪芹

趙景緯

馮去非

徐霖

徐宗仁

危昭德

陳 塏

楊文仲

謝枋得

劉應龍字漢臣瑞州高安人嘉熙二年進士授零陵主簿饒州錄事參軍有毛隆者務剽掠殺人州民被盜遙呼盜曰汝毛隆也盜亦曰我毛隆也既訟於官捕隆置獄應龍曰盜誠毛隆其肯自謂因言於州州不可乃委他官隆誣伏抵死未幾盜敗應龍繇是著名改知崇仁縣淮西失守江西諸州有殘破者縣佐貳聞變先遁應

龍固守不去先是理宗久未有子以弟福王與芮之子為皇子丞相吳潛有異論帝已不樂元兵渡江朝野震動遂丞相丁大全復起潛為相帝問潛策安出潛對曰當遷幸又問卿如何潛曰臣當死守於此帝泣下曰卿欲為張邦昌乎潛不敢復言未幾北兵退帝語羣臣曰吳潛幾誤朕遂罷潛相帝怒潛不已應龍朝受命帝夜出象簡書疏稿授應龍使劾潛應龍謂潛本有賢譽獨論事失當臨變寡斷祖宗以來大臣有罪未嘗輕肆誅

戮欲望姑從寬典以全體貌帝大怒迺按劾丁大全請  
加竄斥疏言內急急於蘇民瘼以固國本外莫急於討  
軍實以振國威又言時政四事廣發廩以振民饑通商  
販以助民食勸分富室以助官糴嚴等第以覈民數稽  
檢放以蘇民窮嚴戢盜以除民害賈似道素忌潛會京  
師米貴應龍為勸糶歌宦者取以上聞帝問知應龍所  
作問似道米價高當亟處之似道訪其由亦怒應龍遷  
司農少卿尋以右諫議大夫孫附鳳言遂去國景定三

年湖南飢起提舉常平以採荒功遷直寶章閣廣南東  
路轉運判官遷祕書監兼國史編修實錄檢討知隆興  
府兼江西轉運副使奏免和糴二十萬石擢權戶部侍  
郎兼侍講時似道當國百官奏對稍切直者輒黜應龍  
言臣觀今日之事可言者多矣邇日以來靖共自守者  
以論事為忌指陳稍切者聯翩引去豈兩省繳駁過甚  
重其疑與抑廷臣奏對拂意速其畏與朝廷清明之時  
而言者已懷畏疑臣恐正臣奪氣鯁臣吃舌宜非盛世

所有遂迂當路自侍從兩省以下無不切齒未幾以集  
英殿修撰知建寧府丞辭中書舍人盧鉞希指封還錄  
黃久之起為江東轉運使辭南海寇作朝廷患之乃以  
顯謨閣待制知廣州廣東經畧安撫使寇聞應龍至適  
去應龍勦逐之南海大治特旨屢召拜戶部侍郎仍兼  
侍讀七上奏辭免德祐元年遷兵部尚書寶童閣直學  
士知贛州兼江西兵馬鈐轄青海軍節度使力辭隱九  
峯子元高亦舉進士知候官縣沒洪天錫嘆曰朝廷失

一御史矣

潘坊字庭堅福州閩人端平二年策進士坊對曰陛下  
承休上帝飯德匹夫何異為人子孫身荷父母劬勞之  
賜乃指豪奴悍婢為恩私之地欲父母無怒不可得也  
又曰陛下手足之愛生榮死哀反不得視士庶人此如  
一門之內骨肉之間未能親睦是以僮僕疾視鄰里生  
侮宜厚東海之恩裂淮南之土以致人和時對者數百  
人庭堅語最直會殿中侍御史蔣峴劾方大琮劉克莊

王邁前倡異論併誣妨姓同逆賊策語不順請昏論以  
漢法妨調鎮南軍節度推官衢州推官厯浙西提舉常  
平司遷太學正旬日出通判潭州日食應詔上封事曰  
熙寧初元日食詔郡縣掩骼著為令故王一抔淺土其  
為暴骸亦大矣請以王禮改葬又移書丞相游似申言  
之似心善其言方將收用之而妨卒

洪芹尚書右僕射适之曾孫以大父澤入官甫更調登  
進士第自南平司法改欽州教授部使者愛其才先後

並薦之有旨召審察丁內外艱入主省架閣遷太學博士輪對發明絜矩之道擢國子博士出通判南劍入為太常博士累遷將作少監屬詞臣無當上意慨然思得天下士丞相程元鳳言當今地望無踰洪芹者進兼翰林權直祕書少監開慶元年升直學士院繼權禮部侍郎中書舍人屬兵興帝悟柄任非人自貽國禍詔書所至聞者奮激蓋芹所草也丁大全罷相出典鄉郡芹遷禮部侍郎繳奏大全鬼蜮之資穿窬之行暴戾淫躋引

用凶惡陷害忠良過塞言路濁亂朝綱乞盡從諫臣所  
請追官遠竄以伸國法以謝天下沈炎乘上怒攻丞相  
吳潛片獨繳奏曰方國本多虞潛星馳赴闕理紛鎮浮  
陳力為多一旦視為弁髦得無如詩所謂將安將樂女  
轉棄予乎慷慨敢言天下義之遷禮部侍郎帝銳意鄉  
用而以論去退寓永嘉怡然自適咸淳初起知寧國府  
卒

趙景緯字德父臨安府於潛人少勤學弱冠得周惇頤

程顥兄弟諸書讀之恨不及登朱熹之門熹門人葉味道謂之曰度正吾黨中第一人遂往見首誨以求放心為本由是往來味道度正之間研索益精入太學登淳祐元年進士第授江陰軍教授丁母憂以祿不逮養服闋不調召為史館檢閱特授祕書郎兼史館校勘進直秘閣差知台州皆辭不許至郡以化民成俗為先務約束官吏擾民五事舉遺逸車若水林正心于朝旌孝行平重刑懲誹訐治豪橫建黃巖縣社倉六十有六浚河道

九十里築隄路三十里節浮費為下戶代輸秋苗奏蠲  
五邑坊河渡錢期年之內乞歸田里者再進考功郎官  
兼沂靖惠王府教授御筆兼崇政殿說書又皆辭不許  
乃造朝侍緝熙殿以易進講論聖人體元之妙在惟幾  
人君得此則天下有治而無亂人事有吉而無凶矣又  
曰惕厲祇懼乃天心之所存聖人先處於憂故能無憂  
先處以危故能無危若乃先自處於安樂則憂危乘之  
矣又論監司守令與其糾劾於有罪之後而未必盡得

其情孰若精擇於未用之先而使之各稱其職。孳出於柳應詔上封事願陛下捐內帑以絕壅利之弊。出嬪嬙以節用度之奢。弄權之貂寺素為天下之所共惡者。屏之絕之。毒民之思澤侯嘗為百姓之所憤者。黜之。弃之。擇忠鯁敢言之士。置之臺諫。以通闕隔之壅。選慈惠忠信之人。使為守宰。以保元氣之殘。又必稽乾淳以來。凡利祿窳名之在百司庶府者。悉隸其舊。以濟經用之急。公田派買不均之弊。聽民自陳。隨宜通變。以安田里。則

人心悅天意解矣兼國史院編修官實錄院檢討官拜  
太府少卿以直敷文閣知嘉興府又皆辭不許至郡首  
以護根本正風俗為先務拜宗正少卿御筆兼侍講兼  
權工部侍郎時暫兼權中書舍人又皆辭不許以禮記  
進講開陳敬恕之義封還濫恩詞頭帝從之進權禮部  
侍郎兼修玉牒升兼侍讀仍辭不許進聖學四箴一曰  
惜日力以致其勤二曰精體認以克其知三曰屏嗜好  
以專其業四曰謹行事以驗其用五乞歸田里帝勉留

之請益力特授集英殿修撰知建寧府辭不許乃還家  
召為中書舍人三辭不許請益力進顯文閣待制依所  
乞予祠辭職名不許遂差提舉玉隆萬壽宮疾卒詔特  
贈四官至中奉大夫謚文安景緯天性孝友雅志冲澹  
親沒無意仕進故其立朝之日不久云

馮去非字可遷南康都昌人淳祐元年進士皆幹辦淮  
東轉運司治儀真歐陽修東園在焉使者黃濤欲以為  
佛寺時已許薦去非力爭不得寧不受使者薦謁告而

去寶祐四年召為宗學諭丁大全為左諫議大夫三學諸生叩閣言不可帝為下詔禁戒詔立石三學去非獨不肯書名碑之下方監察御史吳衍翁應弼劾諸生下獄去非復調護宗學生之就逮者未幾大全簽書樞密院事參知政事蔡抗去國去非亦以言罷歸舟泊金焦山有僧上謁去非不虞其為大全之人也周旋甚款僧乘間致大全意願毋遽歸少俟收召誠得尺書以往成命即下去非奮然正色曰程丞相蔡叅政牽率老夫至

此今歸吾廬山不復仕矣斯言何為至哉絕之不復與  
言

徐霖字景說衢州西安人年十三有志聖人之道取所  
作文焚之研精六經之奧探贖先儒心傳之要淳祐四  
年試禮部第一知貢舉官入見理宗曰第一名得人嘉  
獎再三登第授沅州教授時宰相史嵩之挾邊功要君  
植黨顯國霖上疏厯言其姦深之狀以為其先也奪陞  
下之心其次奪士大夫之心而其甚也奪豪傑之心今

日之士大夫嵩之昏變化其心而收攝之矣且其變化之術甚深非章章然號於人使之為小人也常於善類擇其質柔氣弱易以奪之者親任二三其或稍有異已則潛棄而擯遠之以風其餘彼以名節之尊不足以易富貴之願義利之辨亦終暗於妻妾宮室之私則亦從之而已疏奏見者為霖危之未幾嵩之匿父喪求起復君子並起而攻之

按癸辛雜識載淳祐初年喬行簡李宗勉皆去位嵩之以右丞相獨用權

三學生上書攻之明年徐霖伏闕上書疏其罪是歲仲冬嵩之父彌忠殂於家不即奔喪公論沸騰未幾御筆

史嵩之起復將作監徐元杰少帝大感悟丞相范鍾進  
監史季溫右史韓祥皆有疏論

所召試館職二人上思霖之忠親去其一易霖名及試  
則曰人主無自強之志大臣有患失之心故元良未建  
凶姦未竄是時丞相杜範已故而鍾雖得位畏姦人覆  
出為已禍故也擢祕書省正字霖辭不獲命遂就職會  
日食霖應詔上封事曰日陽類也天理也君子也吾心  
之天理不能勝乎人欲朝廷之君子不能勝乎小人宮  
闈之私暱未屏瑣闥之姦邪未辨臺臣之討賊不決精

稷感浹日為之食又數言建立太子遷校書郎七年大旱霖應詔言諫議大夫不易則不雨京兆尹不易則不雨不報去國帝遣著作郎姚希得留之不還御筆改合入官迺改宣教郎霖屢辭曰向為身死而不敢欺其君父今以官高而自眩於平生失其本心何以暴其忠志八年夏添差通判信州霖皆力辭尋令守臣勉諭之特改宣教郎主管雲臺觀霖迺拜受十二年遷祕書省著作郎累辭不許

按癸辛雜識霖去國傳旨俾宰執留之又令左史尹煥面留又令姚希得傳旨

勉諭毅然不徙沽激太甚其居衡也屢有召守不就除  
著作郎則翻然而來及乞罷豪諫御筆謂其首鼠兩端  
與外差遣尚遲回不去趙汝騰趨其出關蓋霖之無  
忌憚皆汝騰成其狂未幾察官蕭泰來數其十二狂不  
可治即於是聲名掃地與  
宋史本傳所載異附識兼國史編修實錄檢討帝曰

今日所當言者當備陳之霖復以正太子名為言兼權  
尚左郎官兼崇政殿說書迺上疏言葉大有陰柔姦黠  
為羣儉冠不宜久長臺諫乞斥去不報兼權左司霖知  
無不言於是讒嫉者思以中傷而帝亦不悅乞補外知  
撫州祠先賢寬租賦賑飢窮誅悍將建營砦幾一月而

政舉化行以言去士民遮道不得行及暝始由徑以出  
寶祐元年差知衡州三年當之官遂辭差知袁州五年  
丁外艱明年開慶元年差主管崇禧觀景定二年知汀  
州明年卒尚書省請加優異詔與一子恩澤度宗賜祭  
田百畝以旌直臣

徐宗仁字求心信之永豐人淳祐十年進士歷官為國  
子監主簿開慶元年伏闕上書曰今天下如器之敝而  
未墜於地存亡之機固不容髮環視四境類不足恃而

所恃以維持人心奔走豪傑者惟陛下賞罰之微權在耳自幹腹之兵越江踰廣以來凡閱數月尚未聞有死戰陣死封疆死城郭者豈賞罰不足以勸懲之耶今通國之所謂佚罰者不過丁大全袁玠沈翥張鎮吳衍翁應弼石正則王立愛高鑄之徒而首惡則董宋臣也廷紳抗疏學校叩闕至有欲借尚方劍為陛下除惡陛下乃釋而不問彼方擁厚貲挾聲色高卧華屋三軍之在行者捐軀兵革百姓之罹難者流血鋒鏑陛下亦嘗一

念及此乎又極論邊事論惠褻而威不振又請使有言責者皆得以盡其言則國論伸而國威振遷國子監丞祕書省著作佐郎考功郎官太府少卿又遷太常少卿知寧國府監察御史郭閻論罷德祐元年起授吏部侍郎權禮部尚書兼益王府贊讀衛益王走海上厓山兵敗死焉

危昭德昭武人寶祐元年進士歷官為史館檢閱校勘武學諭宗正寺簿兼崇政殿說書遷祕書郎疏言國之

命在民民之命在士大夫士大夫不廉脫民膏血為已  
甘腴民不堪命矣又言願陛下與二三大臣察利害之  
竇究安危之本凡荒政之當舉者不可一日而置念又  
言願陛下舉考課之事內以責諸彈糾之職外以責諸  
監司郡守之計進兼侍講又言民者邦之命脈欲壽國  
脈必厚民生欲厚民生必寬民力且條上厲民四弊又  
言願陛下為萬世根本之慮為一時倉猝之防必求安  
節之亨母招不節之咎又乞察欣瘁休戚之故酌利害

損益之宜遷起居舍人兼國史編修實錄檢討尋遷殿中侍御史侍御史諫作宗陽宮權工部侍郎兼同修國史實錄院乞致仕特轉一官昭德在經筵以易春秋大學衍義進講反覆規正甚多子徹孫咸淳元年進士

陳塏字子爽嘉興人歷京湖制置使司主管機宜文字差知德安府歷遷太府卿司農卿權工部侍郎入奏言願陛下轉移世道之樞機砥礪士大夫之廉恥使知名義為重利祿為輕久去國以恬退聞者名之久立朝以

更迭請者從之甘言容悅者必斥真情句閑者勿留如  
此則君臣上下皆以真實相與四維既張士大夫難進  
易退之風當見於聖世以言罷未幾進集英殿修撰知  
婺州改知太平州兼江東轉運副使請蠲放諸郡災傷  
加戶部侍郎准東總領尋提領江淮茶鹽所兼知太平  
州發公帑代三縣輸折絲帛錢五十萬九千三百六十  
餘貫又作浮淮書堂以處兩淮之民而教之積官加端  
明殿學士咸淳四年卒諡清毅塏屢歷麾節軍民愛戴

幕客盛多而塏又樂薦士焉

楊文仲字時發眉州彭山人七歲而孤母胡年二十有八守節自誓教養諸子文仲既冠以春秋貢其母喜曰汝家至汝三世以是經收效矣淳祐七年文仲以胄試第一入太學九年又以公試第一升內舍時言路頗壅因季冬雷震首帥同舍叩閣極言時事有曰天本不怒人激之使怒人本無言雷激之使言一時爭傳誦之升上舍為西廊學錄丞相謝方叔嘗問文仲曰今日何事

最急對曰國本未建莫大於此帝意未喻當以死請可也寶祐元年登進士第調復州學教授轉運使印應飛辟入幕明廢婦寃獄應飛悉從文仲議且薦之荆湖宣撫使趙葵署文仲佐分司幕姚希德江萬里合薦文仲學為有用辟四川宣撫司準備差遣添差沿海制置司幹辦公事召為戶部架閣遷太學正升博士時從叔父棟為祭酒講學益詣精邃遷國子博士勾外添差通判台州故事守貳尚華侈正月望取燈民間吏以白文仲

曰為吾然一燈足矣勸農東郊守因欲泛湖文仲即先  
馳歸添差通判楊州牙契舊額歲為錢四萬緡累政增  
至十六萬開告訐以求羨文仲曰希賞以擾民吾不為  
也卒增十八界一而已制置使李廷芝檄主管機宜文  
字時有沙田使者欲舉行之文仲力爭以為事不可妄  
興蓋與民之惠有限不擾之惠無窮事遂不行召為宗  
學博士近輔兵變水患輪對言皇天眷命垂四百年天  
命久熟之餘國脈癯老之候此豈非一大喜懼之交乎

願陛下內擴聰明自作主宰又曰春多沈陰豈但麥秋之憂於時為夬尤軫覓陸之慮天目則洪水發馬蘇湖則弄兵興馬戕冠于于而每見大夫之乏使佩仰纍纍而常慮貪瀆之無厭將習黃金橫帶之娛兵疲赤藉毋虛之冗蚩蚩編氓得以輕統府瑣瑣警遽輒以憂朝廷設不幸事有大於此者國何賴馬帝竦聽顧問甚至遷太常丞尋兼權倉部郎官兼崇政殿說書遷將作少監又遷將作監文仲在講筵每以積誠感動嘗進讀春秋

帝問五霸何以為三王罪人文仲奏云齊桓公當王霸  
升降之會而不能為向上事業獨能開世變厲階臣考  
諸春秋桓公初年多書人越二十年代楚定世子之功  
既成然後書侯之辭迭見此所以為尊王抑霸之大法  
然王豈徒尊哉蓋欲周王子孫率修文武成康之法度  
以扶持文武成康之德澤則王迹不熄西周之美可尋  
如此方副春秋尊王之意盛夏建宗陽宮壞徙民居畿  
甸駸然文仲疏諫移閭閻之聚為香火之庭不得為善

計矣陛下紹祖宗之位豈以黃老之居為輕重哉翌日  
面奏益懇至詔卿監以上薦人才文仲薦陳存呂折鍾  
季玉等十有八人名士二人金華王栢天台車若水也  
兼國子司業兼侍立修注官又以掾太學教諭彭成天  
迂似道主管崇禧觀出知衡州運餉有法而民不擾以  
所當得米八千石立思濟倉召為祕書少監尋兼崇政  
殿說書以疾乞致仕不許兼國史院編修官實錄院檢  
討官遷太常少卿兼國子司業遷起居舍人少帝即位

授權工部尚書兼權侍右郎官尋兼給事中有事明堂  
議以上公攝行文仲議曰今祇見天地之始雖在幼冲  
比即喪次已勝拜跪執禮無遺所當親饗時丞相王爚  
陳宜中不協文仲尚疏言事危且急矣祖宗所深賴億  
兆所寄命在乎二相苟以不協之故今日不戰明日不  
征時不再來後悔何及尋兼國子祭酒元兵渡江畿甸  
震動朝士多棄去者侍從班惟文仲一人詔旌在列不  
去者二階文仲疾益甚旬祠以集英殿修撰知漳州三上

乞致仕改知泉州因將家踰嶺南待次卒而宋亡矣  
謝枋得字君直信州弋陽人也為人豪爽每觀書五行  
俱下一覽終身不忘性好直言一與人論古今治亂國  
家事必掀髯抵几跳躍自奮以忠義自任徐霖稱其如  
驚鶴摩霄不可籠繫寶祐中舉進士對策極攻丞相董  
槐與宦官董宋臣意擢高第矣及奏名中乙科除撫州  
司戶叅軍即棄去明年復出試教官中兼經科除教授  
建寧府未上吳潛宣撫江東西辟差幹辦公事團結民

兵以扞饒信撫科降錢米以給之枋得說鄧傳二社諸  
大家得民兵萬餘人守信州暨兵退朝廷覈諸軍費幾  
至不免五年彗星出於東方枋得考試建康摘似道政  
事為問自言兵必至國必亡漕使陸景思銜之上其稿  
於似道坐居鄉不法起兵時冒破科降錢且訛謗追兩

官謫居興國軍

伏讀通鑑輯覽

以批試士而以政事為問目孰是孰非原不妨於縷指至於  
國家廢興則非草野所宜妄論且明知大勢已去為臣子  
者隱痛尤深何忍於盈庭發策之時斥言宗社枋得固素  
知大義者而其情過激遂乖敬慎之常又何怪權奸之借

端指  
摘乎

咸淳三年赦放歸德祐元年呂文煥導大元兵東下

鄂黃蘄安慶九江凡其親友部曲皆誘下之遂屯建康

枋得與呂師夔善乃應詔上書以一族保師夔可信乞分

沿江諸屯兵以之為鎮撫使使之行成

伏請通鑑輯覽

御批師夔舉族降元並受官職叛逆顯然而其部曲又爭相  
降附呂氏之罪惡更無可原枋得固素稱守道重義者何  
亦狃於私交保其可信且欲藉以行成其視司馬遷之於  
李陵殆有甚矣迨次年安仁之戰卒敗于師夔能無自悔耶

且願至江州見文煥與議從之使以沿江察訪使行會

文煥北歸不及而反以江東提刑西西招諭使知信州

明年正月師夔與武萬戶分定江東地枋得以兵逆之使前鋒呼曰謝提刑來呂軍馳至射之矢及馬前枋得走入安仁調淮士張孝忠逆戰圍湖坪矢盡孝忠揮雙刀擊殺百餘人前軍稍却後軍繞出孝忠後衆驚潰孝忠中流矢死馬奔歸枋得坐敵樓見之曰馬歸孝忠敗矣遂奔信州師夔下安仁進攻信州不守枋得乃變姓名入建寧唐石山轉茶坂寓逆旅中日麻衣躡履東鄉而哭人不識之以為被病也已而去賣卜建陽市中有

來卜者惟取米屨而已委以錢率謝不取其後人稍稍  
識之多延至其家使為弟子論學

伏讀通鑑輯覽

即此  
猶以論學為人所宗正所謂進退無據史尚有與辭豈正見哉

天下既定遂居閩中至元二十三年集賢學士程文海  
薦宗臣二十二人以枋得為首辭不起又明年行省丞  
相蒙古岱將旨詔之執手相勉勞枋得曰上有堯舜下  
有巢由枋得名姓不祥不敢赴詔丞相義之不強也二  
十五年福建行省叅政管如德將旨求江南人材尚書

留夢炎以枋得薦枋得遺書夢炎曰江南無人材求一  
瑕呂飴甥程嬰杵白廝養卒不可得也紂之亡也以  
八百國之精兵而不敢抗二子之正論武王太公凜凜  
無所容急以興滅繼絕謝天下殷之後遂與周並立使  
三監淮夷不叛武庚必不死殷命必不黜夫女真之待  
二帝亦慘矣而我宋今年遣使祈請明年遣使問安王  
倫一市井無賴狎邪小人謂梓宮可還太后可歸終則  
二事皆符其言今一王倫且無之則江南無人材可見

也今吾年六十餘矣所欠一死耳豈復有它志哉終不  
行郭少師從少帝北遷既南歸與枋得道時事曰大  
元本無意江南屢遣使使頓兵今無深入待還歲  
幣即議和無枉害生靈也張宴然上書乞斂兵從和  
上即可之兵交二年無一介行李之事乃挈數百年  
宗社而降因相與痛哭福建行省叅政魏天祐見時方  
以求材為急欲薦枋得為功趙孟頫來言枋得罵曰  
天祐仕閩無毫髮推廣德意反起銀冶病民顧以我

輩飾好邪及見天祐又傲岸不為禮與之言坐而  
不對天祐怒強之而北枋得即日食菜果二十六年  
四月至京師問謝太后櫬所及少帝所在再拜  
慟哭已而病遷憫忠寺見壁間曹娥碑泣曰小女子  
猶爾吾豈不汝若哉留夢得使醫持藥雜米飯進  
之枋得怒曰吾欲死汝乃欲生我耶棄之地終不食死  
伯父徽明以特奏恩為當陽尉攝縣事於天基  
節上壽元兵奄至徽明出兵戰死二子生進抱

父屍亦死



欽定續通志卷四百十六